

親征平定朔漠方略

二三

親征平定朔漠方略卷之三十六

二月癸未。

督運于成龍等請以旗員蒙古兵分運併携
理藩院官同行。于成龍等奏曰。此次運米。俱
用牲口馱運。止有臣等七人。恐前後不能管
攝。請將部院官及旗員酌量帶往。其情願効
力人等。亦令隨行。分管押運。至牽駱駝負米

遠行之事。蒙古兵所習。請調取專任之。

上曰。旗員及効力人等。並准帶往。大同現有察哈爾兵一百六十名。爾等經其地。可率之前去。如有用蒙古兵之處。再來奏請。于成龍等又奏曰。臣

等七人前後魚貫而行。請以肥馬居前。

上曰。馬聚一處。必至受傷。肥馬在前極是。但所負過重。則遠道長驅。終有何益。爾等應加酌量。可負

二百觔者。率以百觔爲準。至運之之法。亦照坐
塘通運爲便。于成龍等又奏曰。轉運所經。盡蒙
古部落。或有調遣。滿文漢字。難以通達。恐於
機宜不便。請帶理藩院章京二員。筆帖式二
員。撥什庫五員。及勘合火牌。用印空白紙牌
隨行。以便遣用。

上曰。蒙古地方。理藩院官吏甚有用。可從多帶往。

甲申。

嚴飭都御史于成龍援引朋黨。時于成龍等爲運米事入奏曰。臣等所運米幾九千石。用駱駝負之。需七千餘頭。用馬騾負之。需萬餘匹。牽萬餘牲畜。需人甚多。諸臣會議。但撥綠旗兵一千。人不足用。請將附近地方之鄂爾多斯。從多派出。使之牽馱。

上曰。朕已知悉。爾等可將鄂爾多斯貝勒該管官員。
一併帶去。于成龍又奏曰。諸臣會議。運米僅令
備正額牲口。沿途倘有疲乏。無可更替矣。臣
等願酌備餘馬。以待。

上曰。可。著該督撫布政使。酌量多備。于成龍等奏事
畢而出。

上呼于成龍問曰。爾等何日起程。于成龍奏曰。臣等

俟効勞運米官同行。

上曰。爾此意卽謬矣。凡爲人臣者。宜以國事爲重。黽
勉自効。不當援引朋類。當此緊急軍務。爾宜率
先起行。餘令陸續隨往。若必俟衆同行。寧不悞
事。爾自任巡撫。以及總河。皆唯爲人行事。其後
運米亦仍如此。爾前在河工。曾帶二百餘人前
往。迄今未用一人。欲任意援引得乎。爾前此運

米已甚失策。凡人有優劣。馬有肥瘦。若果人馬
相稱。爾身先率領催趲前行。自可早至克魯倫
地方。不致有悞。爾遲遲而行。務期與衆同到。幾
悞國家大事。爾又云寧殺于成龍。至捐納人等
不可不用。此語豈非沽名干譽之意乎。汝一生
品行。皆于此玷矣。朕前此屢加嚴飭。爾竟不悛。
此是何故。朕於國家之事。惟虛已以視機宜。斷

不膠執已見。卽用兵之道。亦復如是。一日之中。
有千變萬化。朕統大兵。至克魯倫時。亦視賊之
形勢。隨機而應。並不預立已見。孔子云。毋意毋
必毋固毋我。聖人之言。至當不易。爾于成龍惟
執已見而已。前此運米。因待衆悞事。今又欲候
齊同行。此不過扶助爾之黨類。令感激汝恩之
意。殊不知用人之權。爲人臣者。不得而專之。朕

今用人。若有保舉官員。亦必就其中論俸補用。
卽有素所深知者。亦視其効力之處。酌量擢用。
否則俱使論俸。朕乃天下之主。用人之際。尚不
肯任意而行。爲人臣者。乃欲妄意自擅可乎。大
抵欲援助人者。後必自己獲罪。于成龍奏曰。臣
向愚昧。無知妄行。今聞

皇上聖訓。臣實無辭可辨。嗣後必不敢爲人。自陷死

罪。免冠叩頭而出。

乙酉。

覈實諸王捐助馬匹。

上諭內大臣曰。著諭捐馬諸王大臣。將此番出兵。汝等所捐之馬。於還師之日。各查其數。開明某人先捐助若干。今回來若干。交奏事人傳奏。如此奏明。知其實在數目。其中自不至虧損。觀去年

所助馬匹。今猶有未到者。其中有所虧損。亦未
可定。爾等所捐馬果好。則顯然收納。加恩汝等。
如其不然。暗中虧損。豈不可惜。著諭衆知之。

丙戌。

諭運米當隨宜而行。不得預定次序。于成龍等瀕
行。因運米事重。恭請

聖訓以遵

成算。

上曰。前中路糧運。雖未到土喇。尚運至哆囉克等處。

西路軍士。可以無饑。西路之米。雖未運至翁金

地方。然其途甚遠。俱情有可原。故爾寬宥。若無

可原。朕豈容爾等至今日耶。于成龍等頓首謝。

又奏曰。臣等七人。俱願前進効力。應令何人

居先。

上曰。若定先後。則此瞻彼顧。或至遲延。軍糈事屬重。
大爾等酌量而行。又

諭曰。今次所運之米。或隨大兵後行。或與大兵同
行。資其照料。可與大將軍伯費揚古酌行。

大將軍伯費揚古以擒獲噶爾丹之子。上疏

稱

賀。

勅旨內開抄出阿南達報哈密地方擒獲噶爾丹
之子塞卜騰巴兒珠爾之疏。發汝知之。臣思
噶爾丹逆天而行。

皇上俯視中外。皆如赤子。念噶爾丹一日尚存。則外
藩一日不安。

皇上親統六師。往臨克魯倫。噶爾丹不能抗

皇上天威。胆破魂飛。遂至大敗。不能保其妻子。盡棄

老幼鍋釜廬帳。抱頭鼠竄。噶爾丹游竟無定。
其屬下厄魯特來歸

王化者。不可勝數。鋒鏑之餘。尚存厄魯特數人。苟延
殘喘。捕獸乞食。噶爾丹之子塞卜騰巴兒珠
爾。遂爲我所擒。料噶爾丹身命存亡。卽在旦
夕間矣。此誠皆

皇上天縱至聖。前知預定。

獨斷于衷。

聖躬不恤勞苦。暑日不張蓋。日御一食。統領大軍深入。大敗噶爾丹之所致也。臣等與軍中官兵衆部落諸王貝勒貝子公台吉等。聞擒噶爾丹之子塞卜騰巴兒珠爾。不勝懼怖。又差各哨卒報知喀爾喀諸部長矣。爲此奏賀。

上報聞。發部。